

Pregled Dokumenta | Broj 18/10

Početna (/) / Dokumenti (/Docs/) / Službene novine Kantona Sarajevo (/Docs/Drzavni)
/ Dokumenti pregled

Službene novine Kantona Sarajevo, broj 18/10

ZAKON

O VODAMA KANTONA SARAJEVO

I. OSNOVNE ODREDBE

Član I. (Predmet Zakona)

(1) Zakonom o vodama Kantona Sarajevo (u daljem tekstu: Zakon) uređuju se pitanja organizacije i načina obavljanja poslova upravljanja vodama koji su Zakonom o vodama ("Službene novine Federacije BiH", broj 70/06) (u daljem tekstu: Osnovni zakon) preneseni u nadležnost Kantona Sarajevo (u daljem tekstu: Kanton).

(2) Upravljanje vodama u smislu ovog Zakona obuhvata korištenje voda, zaštitu voda, uređenje vodotoka, zaštitu od štetnog djelovanja voda i organizaciju upravljanja vodama.

Član 2. (Svrha Zakona)

Svrha ovog Zakona je osiguranje upravljanja vodama s ciljem:

- a) postizanja racionalnog i održivog korištenja voda,
- b) smanjenja zagađenja voda, postizanje dobrog stanja voda, smanjenje i sprječavanje degradacije voda,
- c) smanjenja rizika od poplava i drugih negativnih uticaja voda,
- d) osiguranja pravičnog pristupa vodama,
- e) zaštita ekosistema,
- f) izgradnje, zaštite, korištenja, održavanja i upravljanja kantonalnim, općinskim, grupnim i lokalnim vodnim objektima za vodosnabdijevanje i druga pitanja iz nadležnosti Kantona.

II. NAČELA I DEFINICIJE UPOTRIJEBLJENI U OVOM ZAKONU

Član 3. (Osnovno načelo)

Vode su opće dobro i kao takvo su pod posebnom zaštitom Bosne i Hercegovine, Federacije Bosne i Hercegovine, Kantona, Grada Sarajeva (u daljem tekstu: Grad) i općina.

Član 4. (Definicije)

(1) Osnovna načela i definicije iz čl. 3. i 4. Osnovnog zakona imaju isto značenje u smislu ovog Zakona, a ostali pojedini izrazi upotrijebljeni u ovom Zakonu imaju sljedeće značenje:

- a) neuređena obala vodotoka je pojas zemljišta uz korito vodotoka, širine najmanje 5 metara, van domašaja velike vode ranga pojave jednom u sto godina (u daljem tekstu: stogodišnja voda), a služi za pristup i redovno održavanje korita vodotoka, kupanje i rekreaciju,
- b) obala prirodnog jezera je pojas zemljišta uz korito jezera van domašaja stogodišnje vode, širine najmanje 50 metara, a služi za pristup jezeru radi kupanja, rekreacije i ribolova,

- c) obala vještačke akumulacije čija je isključiva namjena snabdijevanje stanovništva i privrede vodom za piće je pojas zemljišta van domašaja maksimalno projektovanog nivoa vode u akumulaciji (kota maksimalnog uspora), širine najmanje 50 metara, a služi za pristup vještačkoj akumulaciji radi održavanja voda u toj akumulaciji,
- d) obala vještačke višenamjenske akumulacije koja se gradi za potrebe snabdijevanja vodom privrede, elektroprivrede, sporta, rekreacije i ribolova je pojas zemljišta van domašaja maksimalno projektovanog nivoa voda te akumulacije (kota maksimalnog uspora), širine najmanje 50 metara, a služi za pristup vještačkoj višenamjenskoj akumulaciji radi korištenja voda i održavanja voda te akumulacije u višenamjenske svrhe,
- e) bujičnim tokovima se smatraju povremeni ili stalni vodotoci koji, kao specifičan oblik erozije zemljišta prilikom jakih kiša ili naglog topljenja snijega nabujaju i uz to brzo formiraju i prolaz vodnog talasa opterećenog nanosom iz sliva korita i postižu znatnu brzinu, razornu snagu i izazivaju štete.
- (2) Zabranjeno je ograđivanje neuređenih obala vodotoka, obala prirodnih jezera i obala vještačkih akumulacija iz stava (1) ovog člana.

III. POVRŠINSKE VODE, VODNO DOBRO I VODNI OBJEKTI

Član 5. (Površinske vode i vodno dobro)

Površinske vode i vodno dobro u nadležnosti Kantona su površinske vode koje su Osnovnim zakonom svrstane u vode II kategorije i vodno dobro uz te vode na teritoriji Kantona Sarajevo.

Član 6. (Vodno dobro)

- (1) Vodno dobro, u smislu člana 7. Osnovnog zakona, može biti u vlasništvu Kantona, Grada i općine, pravnog ili fizičkog lica.
- (2) Granice vodnog dobra, za površinske vode II kategorije na osnovu propisa iz člana 8. stav (1) Osnovnog zakona određuje Ministarstvo privrede Kantona Sarajevo (u daljem tekstu: Ministarstvo).
- (3) Granice javnog vodnog dobra upisuju se u zemljišni katastar.

Član 7. (Javno vodno dobro)

- (1) Javno vodno dobro kao dobro od općeg interesa, u smislu člana 9. Osnovnog zakona za sve površinske vode II kategorije na području Kantona je u vlasništvu Grada i općina, prema podacima o upisu vlasništva u zemljišnim knjigama upisanim, do dana stupanja na snagu ovog Zakona.
- (2) U vlasništvu Kantona Sarajevo je javno vodno dobro u smislu člana 7. stav 1. Osnovnog zakona za površinske vode II kategorije, koje je do dana stupanja na snagu ovog Zakona u zemljišnim knjigama upisano kao državno vlasništvo, ili u zemljišnim knjigama nije nikako upisano ili prilikom njihovog upisa u zemljišne knjige niko nije upisan kao njihov vlasnik.
- (3) Općine u Kantonu Sarajevo na čijoj teritoriji se nalazi javno vodno dobro iz stava 2. ovog člana, dužne su u roku od 12 mjeseci nakon stupanja na snagu ovog Zakona, pokrenuti postupak upisa vlasništva u zemljišne knjige na ovim dobrima, pri čemu će općina biti upisana kao vlasnik tog dobra.
- (4) Odluku o korištenju, i drugim pitanjima od značaja za izgradnju, održavanje upravljanje i čuvanje javnih dobara, donosi nadležni općinski organ.

Član 8. (Pripadnost vodnog dobra)

- (1) Određivanje pripadnosti vodnog dobra javnom vodnom dobru za površinske vode II kategorije ministar privrede Kantona Sarajevo (u daljem tekstu: Ministar) utvrđuje rješenjem prema propisu iz člana 8. stav (1) Osnovnog zakona.
- (2) Javno vodno dobro ne može biti predmet prometa, ali može pod posebnim uslovima određenim podzakonskim propisom iz člana 10. stav (4) Osnovnog zakona, biti predmet ograničenog prava korištenja.
- (3) Zemljišna čestica prestaje biti djelom javnog vodnog dobra ako se rješenjem Ministra iz stava (1) ovog Zakona utvrdi da čestica prestaje ispunjavati uslove javnog vodnog dobra.
- (4) Status javnog vodnog dobra prestaje danom upisa promjene statusa u zemljišne knjige na osnovu donesenog rješenja iz stava (1) ovog člana.

Član 9. (Vlasništvo nad zaštitnim vodnim objektima)

- (1) Zaštitni vodni objekti iz člana 14. stav (1) tačka 1. Osnovnog zakona na vodotocima koji pripadaju površinskim vodama II kategorije i uređena korita u urbanim područjima na površinskim vodama I kategorije u vlasništvu su Grada, odnosno općine, ukoliko ista nije na području Grada.
- (2) Grad i općina mogu pravo upravljanja i korištenja vodnih objekata iz stava 1. ovog člana prenijeti u nadležnost drugih organa vlasti, pravnog lica ili druge institucije, u obimu i na način propisan ovim Zakonom ili aktima općine.

(3) Grad i općina su dužni obezbijediti materijalne i organizacione uslove za održavanje vodnih objekata, iz stava (1) ovog člana u funkcionalnom stanju, korištenje u skladu sa njihovom prirodom i namjenom, te njihovo čuvanje od uništenja, oštećenja ili nenamjenskog korišćenja.

(4) Gradsko i općinsko vijeće donosi odluku o načinu korištenja i drugim pitanjima od značaja za održavanje i čuvanje objekata iz stava (1) ovog člana.

Član 10. **(Vlasništvo nad objektima u odnosu na izgradnju)**

(1) Vodni objekti iz člana 14. stav (1) Osnovnog zakona, a koji su izgrađeni sredstvima Kantona u vlasništvu su Kantona, a koja su specijalizirana za obavljanje tih djelatnosti.

(2) Pravo upravljanja i korištenja vodnih objekata iz stava (1) ovog člana Kanton može prenijeti na pravna lica.

(3) Vodni objekti iz stava (1) ovog člana koje su za svoje potrebe izgradila pravna ili fizička lica, u njihovom su vlasništvu i ona brinu o upravljanju tim objektima.

Član 11. **(Odluke za upravljanje vodnim objektima)**

Upravljanje vodnim objektima iz člana 14. Osnovnog zakona, u smislu ovog Zakona, čini skup odluka, aktivnosti i mjera čija je svrha da se izgrađeni vodni objekti održavaju u funkcionalnom stanju i koriste u skladu sa njihovom prirodom i namjenom, da se čuvaju od slučajnog ili namjernog oštećenja ili uništenja, izmjenjuju, rekonstruišu i grade u skladu sa potrebama, planovima i mogućnostima Kantona, Grada, općina i drugih pravnih lica i fizičkih lica.

Član 12. **(Vodni objekti za vodosnabdijevanje)**

Pored objekata za iskorištavanje voda iz člana 14. stav (1) tačka 3. alineja 1) Osnovnog zakona pod vodnim objektima za vodosnabdijevanje u smislu ovog Zakona smatraju se i:

- a) kantonalni vodni objekti za vodosnabdijevanje;
- b) općinski vodni objekti za vodosnabdijevanje;
- c) grupni vodni objekti za vodosnabdijevanje;

d) lokalni vodni objekti za vodosnabdijevanje.

Član 13.
(Kantonalni vodni objekti za vodosnabdijevanje)

- (1) Vodni objekti za vodosnabdijevanje potrošača za područje Grada i drugih općina na području Kantona (u daljem tekstu: kantonalni vodovod) su u vlasništvu Kantona, a pojedini dijelovi ovog sistema mogu biti u vlasništvu drugih pravnih ili fizičkih lica.
- (2) Pravo upravljanja i korištenja vodnih objekata iz stava (1) ovog člana Kanton može prenijeti na pravna lica, koja su specijalizirana za obavljanje tih djelatnosti.
- (3) Cijena vode koja se isporučuje potrošačima iz kantonalnog vodovoda predstavlja ekonomsku cijenu isporučene vode utvrđenu posebnim propisima Kantona.
- (4) Cijena vode iz stava (2) člana obavezno sadrži i troškove za zaštitu izvorišta i obeštećenja vlasnika nekretnina u zonama zaštite izvorišta.
- (5) Način i obim finansiranja naknade iz stava (3) ovog člana, bit će definisan posebnom Odlukom.

Član 14.
(Općinski objekti za vodosnabdijevanje)

- (1) Vodni objekti za vodosnabdijevanje potrošača u općinama koji su izgrađeni sredstvima općina (u daljem tekstu: općinski vodovodi), a koji nisu priključeni na međukantonalni ili kantonalni vodovod, su u isključivom ili pretežnom vlasništvu općine.
- (2) Cijena vode koja se isporučuje potrošačima iz općinskog vodovoda predstavlja ekonomsku cijenu isporučene vode utvrđenu posebnim propisima općine.

Član 15.
(Grupni objekti za vodosnabdijevanje)

- (1) Pod grupnim vodnim objektom za vodosnabdijevanje (u daljem tekstu: grupni vodovod), u smislu ovog Zakona, smatra se vodni objekat za vodosnabdijevanje jednog ili više naselja koji ima zaštićeno i uređeno izvorište ili više izvorišta, kaptažu ili više kaptaža, rezervoar ili više rezervoara i razvodnu mrežu i koji je izgrađen sredstvima korisnika, a služi za snabdijevanje vodom za piće više od 500, a manje od 3.000 stanovnika.
- (2) Grupni vodovod je u vlasništvu stanovnika naselja koji su ga izgradili za svoje potrebe.

Član 16.
(Upravljanje grupnim objektom za vodosnabdijevanje)

(1) Radi očuvanja života i zdravlja korisnika grupnog vodovoda, vlasnici grupnog vodovoda su dužni u roku od 12 mjeseci od dana stupanja na snagu ovog Zakona, da upravljanje grupnim vodovodom ugovorom povjere pravnom licu koje je registrovano i specijalizovano za obavljanje tih poslova.

(2) Ugovorom iz stava (1) ovog člana, utvrđuju se međusobna prava i obaveze potpisnika ugovora.

Član 17. **(Broj korisnika grupnog vodovoda)**

Grupni vodovodi čiji broj korisnika pređe 3.000 saglasno članu 15. ovog Zakona, postaju općinski vodovodi.

Član 18. **(Lokalni vodni objekat za vodosnabdijevanje)**

(1) Lokalnim vodnim objektom za vodosnabdijevanje (u daljem tekstu: lokalni vodovod), u smislu ovog Zakona, smatra se vodni objekat za vodosnabdijevanje jednog ili više naselja koji ima zaštićeno izvorište ili više izvorišta, kaptazu ili više kaptaža, rezervoar ili više rezervoara i razvodnu mrežu i koji je izgrađen sredstvima korisnika, a služi za snabdijevanje vodom za piće do 500 stanovnika.

(2) Lokalni vodovodi, javne česme na lokalnim vodovodima i javni bunari u naseljima su u vlasništvu pravnih i fizičkih lica koji su te objekte izgradili za vlastite potrebe.

(3) Investitori izgradnje lokalnih vodovoda, javnih česmi na lokalnim vodovodima i javnih bunara, njihovi vlasnici i korisnici, imaju prava, dužnosti i odgovornosti utvrđene ovim Zakonom.

(4) Radi očuvanja života i zdravlja korisnika lokalnog vodovoda, vlasnici lokalnog vodovoda su dužni da povjere pravnom licem specijalizovanom za obavljanje poslova redovne kontrole zdravstvene ispravnosti vode lokalnog vodovoda i da ugovorom utvrde međusobna prava i obaveze potpisnika ugovora.

(5) Pravnim i fizičkim licima koja nisu učestvovala u izgradnji lokalnog vodovoda odobrit će se priključenje na isti na osnovu vodnog akta koje izdaje Ministarstvo ako količina vode može zadovoljiti potrebe svih priključenih korisnika lokalnog vodovoda.

(6) Pravno i fizičko lice kome se dozvolilo priključenje na lokalni vodovod dužno je sa vlasnicima zaključiti ugovor u kome će biti utvrđena njegova obaveza da vlasnicima plati srazmjeran dio troškova izgradnje vodovoda.

Član 19. **(Obaveza održavanja vodnih objekata)**

- (1) Vlasnici, odnosno korisnici vodnih objekata iz čl. 15.-19. Osnovnog zakona i čl. 12.-18. ovog Zakona dužni su objekte održavati u funkcionalnom stanju i koristiti ih u skladu sa njihovom prirodom i namjenom.
- (2) Vlasnik odnosno korisnik vodnog objekta iz stava (1) ovog člana dužan je u slučaju prestanka upotrebe tih objekata, postupiti u skladu sa vodnim aktom, odnosno objekte održavati u stanju koje neće prouzrokovati štete režimom voda trećim licima.
- (3) Ako vlasnik odnosno korisnik ne održava vodni objekat u funkcionalnom stanju i ne koristi ga na način određen u stavu (1) ovog člana, kantonalna vodna inspekcija rješenjem nalaže potrebne mjere.
- (4) Vlasnik, odnosno korisnik vodnog objekta dužan je vodni objekat održavati i koristiti u skladu sa općim aktom, iz člana 20. stav (6) Osnovnog zakona, o održavanju, korištenju i osmatranju vodnog objekta i postupanju u slučaju kvara ili havarije na objektu.
- (5) Vlasnik, odnosno korisnik vodnog objekta dužan je brinuti o čuvanju vodnog objekta i uređaja na njemu od slučajnog ili namjernog oštećenja.
- (6) Korisnik objekata iz člana 14. stav (1) tačka 1) Osnovnog zakona nije odgovoran za štete nanesene trećim licima koje su nastale zbog neizgrađenosti ili nedovoljne osposobljenosti vodnih objekata.

IV. UPRAVLJANJE VODAMA

Član 20. (Upravljanje vodama)

Upravljanje vodama čini skup odluka aktivnosti i mjera čija je svrha održavanje, poboljšanje i ostvarivanje potrebnog i održivog režima voda na određenom prostoru u skladu sa prirodnim uslovima, planom, potrebama i mogućnostima, a ostvaruje se naročito osiguranjem potrebnih količina voda odgovarajućeg kvaliteta za različite namjene, uređenjem voda i vodotoka, zaštitom voda od zagađivanja i zaštitom od štetnog djelovanja voda.

Član 21. (Ciljevi upravljanja vodama)

Ciljevi upravljanja vodama su: postizanje dobrog stanja, odnosno dobrog ekološkog potencijala površinskih i podzemnih voda, vodnih i uz vodu vezanih ekosistema, umanjene šteta prouzrokovanih raznim štetnim djelovanjem voda, osiguranje potrebnih količina vode odgovarajuće kvalitete i razne namjene i podsticanja održivog korištenja voda, uzimajući u obzir dugoročnu zaštitu raspoloživih izvorišta i njihovog kvaliteta.

1. Teritorijalne osnove upravljanja vodama

Član 22. (Vodna područja)

Područje Kantona obuhvata teritoriju dva vodna područja utvrđena članom 23. stav (2) Osnovnog zakona i to:

- a) najvećim dijelom teritorija Kantona obuhvata Vodno područje Save u smislu člana 23. stav (3) Osnovnog zakona;
- b) područje koje se odnosi na zaštićeno područje kanjona Rakitnice (Visočice) kao područja od posebnih obilježja od značaja za Federaciju Bosne i Hercegovine (Prostorni plan Kantona Sarajevo 2003.-2023. god.) je Vodno područje Jadranskog mora u smislu stava (4) istog člana.

2. Strategija upravljanja vodama

Član 23. (Politika upravljanja vodama)

- (1) Politika upravljanja vodama određuje se strategijom upravljanja vodama.
- (2) Donošenje strategije i planova upravljanja vodama uređeni su čl. 24.-43. Osnovnog zakona.

V. KORIŠTENJE VODA

Član 24. (Korištenje voda)

Korištenje voda, prema ovom Zakonu, obuhvata:

- zahvatanje, crpljenje i upotrebu površinskih i podzemnih voda za različite namjene (snabdijevanje vodom za piće, sanitarne i tehnološke potrebe, navodnjavanje i dr.),

- korištenje vodnih snaga za proizvodnju električne energije i druge pogonske namjene,
 - korištenje vode za uzgoj ribe,
 - korištenje vode za plovidbu, sport i rekreaciju i druge slične namjene
- e) za privredne djelatnosti.

Član 25.
(Korištenje višenamjenske akumulacije)

Voda višenamjenskih akumulacija čija je osnovna namjena proizvodnja električne energije, koristi se i za snabdijevanje vodom stanovništva i privrede, sport, rekreaciju i plovidbu bez pogona na naftne derivate i za uzgoj riba.

Član 26.
(Pristup korištenju voda)

(1) Svakome je dozvoljeno korištenje voda pod uslovima određenim ovim Zakonom.

(2) Voda se mora koristiti ekonomično. Svaki korisnik vode dužan je koristiti vodu na način i u obimu kojim se voda čuva od rasipanja i štetnih promjena njenog svojstva (kvaliteta) i omogućuje zakonsko pravo korištenja voda drugim osobama.

Član 27.
(Opća upotreba vode)

(1) Svakome je dozvoljeno koristiti vodu običnim načinom koji ne zahtijeva posebne naprave i ne isključuje druge od jednakog korištenja vode (opća upotreba).

(2) Opća upotreba vode obuhvata naročito:

- a) zahvatanje vode bez posebnih naprava iz vodotoka i jezera za osnovne potrebe jednog domaćinstva;
- b) zahvatanje podzemne vode (bunara na vlastitom zemljištu) ili vode sa izvora na vlastitom zemljištu koja se koristi za potrebe jednog domaćinstva;
- c) prikupljanje i korištenje oborinskih voda za osnovne potrebe jednog domaćinstva koje se skupljaju na vlastitom zemljištu;

d) rekreaciju na vodama.

(3) Osnovnim potrebama domaćinstva iz stava (2) ovog člana smatra se korištenje vode za piće, održavanje čistoće i slične potrebe u domaćinstvu. Takvim korištenjem se ne smatra korištenje vode u tehnološkom procesu pri obavljanju privredne djelatnosti.

Član 28. **(Korištenje vode)**

(1) Za svako korištenje vode koje prelazi obim opće upotrebe iz člana 27. ovog Zakona potrebna je vodna dozvola koja se izdaje na način propisan Osnovnim zakonom.

(2) Korištenje vode za snabdijevanje stanovništva vodom za piće, sanitarne potrebe i potrebe protivpožarne zaštite ima prednost u odnosu na korištenje vode za ostale namjene iz člana 24. ovog Zakona.

Član 29.

Skupština Kantona Sarajevo (u daljem tekstu: Skupština), Vlada Kantona Sarajevo (u daljem tekstu: Vlada), Ministarstvo i drugi organi Kantona, organi Grada i organi općina na području Kantona, kao i pravna i fizička lica dužni su, svi u okviru svojih prava i obaveza, da čuvaju raspoložive količine i prirodna svojstva voda, da se vode koriste racionalno i u raznovrsne namjene zadovoljavajući pri tome prvenstveno širi javni interes i načelo održivog ravoja kojima se zadovoljavaju potrebe sadašnje generacije i ne ugrožavaju pravo i mogućnost budućih generacija da to ostvare za sebe.

Član 30.

Pravna i fizička lica koja u tehnološkim procesima koriste vodu, dužna su da koriste vodu u skladu sa realno potrebnim količinama i po pravilu, višekratno.

1. Voda za piće

Član 31.

Zakonodavni i izvršni organi Kantona, organi Grada, općine, pravna lica, kao i građani Kantona, dužni su, svako, u okviru svojih prava i obaveza i realnih ekonomskih

mogućnosti, da sprovode mjere i aktivnosti kojima će se obezbijediti da svi građani Kantona i ostali korisnici voda za piće na području Kantona budu u jednakom položaju kada je u pitanju snabdijevanje vodom za piće, kako u pogledu količine, tako i kvalitetu voda.

Član 32.

Područja Kantona na kojima je strategijom i planovima upravljanja vodama i prostorno-razvojnim dokumentima Kantona predviđena izgradnja akumulacija, objekata za snabdijevanje vodom za piće i upravljanje režimom voda, pod posebnom su zaštitom Kantona i ne mogu se koristiti za namjene kojima se sprečava ili otežava izgradnja planiranih akumulacija.

VI. ZAŠTITA VODA

Član 33.

(Značaj zaštitnih vodnih objekata)

Objekti za zaštitu voda od zagađivanja iz člana 14. stav (4) Osnovnog zakona (kolektori za prijem i transport otpadnih voda, postrojenja za prečišćavanje otpadnih voda, ispusti u prijemnik i drugi pripadajući objekti i oprema) su od posebnog značaja za Kanton, Grad i općine na području Kantona.

1. Zabrane i ograničenja

Član 34.

(Zaštita voda od zagađivanja)

Zaštita voda od zagađivanja na području Kantona, u skladu sa Osnovnim zakonom i ovim Zakonom, provodi se zabranom, ograničavanjem i sprečavanjem unošenja u površinske vode, na javno vodno dobro, poljoprivredno, šumsko i građevinsko zemljište i u atmosferu opasnih i štetnih materija koje na direktan ili indirektan način dopijevaju u površinske vode i podzemne vode i time je zagađuju i stvaraju neupotrebljivom za razne namjene (za piće, sanitarne potrebe, za prehrambenu proizvodnju, farmaceutsku proizvodnju, navodnjavanje, ribolov, kupanje i slično), kao i propisivanjem i poduzimanjem drugih mjera za očuvanje i poboljšanje kvaliteta raspoloživih voda na području Kantona Sarajevo.

Član 35.

(Zabrane i ograničenja)

Pored zabrana i ograničenja u smislu čl. 53., 56, stav 4., 58. i 59 stav 1. Osnovnog zakona, u cilju očuvanja kvaliteta površinskih i podzemnih voda na području Kantona:

- a) zabranjuje se ugradnja onih tehnologija u proizvodnju od strane pravnih i fizičkih lica koje nemaju status odgovarajuće tehnologije po standardima Evropske unije u pogledu zaštite voda od zagađivanja i čovjekove okoline, što investitor mora dokazati dokumentima koje izdaju nadležni organi,
- b) zabranjuje se izgradnja proizvodnih kapaciteta koji proizvode opasne i štetne materije za vode na području Kantona, bez istovremene izgradnje odgovarajućih uređaja za prečišćavanje otpadnih voda, odnosno ugradnje uređaja za smanjenje emisija opasnih i štetnih materija u atmosferu, kao i deponija za odlaganje mulja iz uređaja za prečišćavanje otpadnih voda odnosno deponija za odlaganje opasnih i štetnih materija iz uređaja za smanjenje emisija opasnih i štetnih materija u atmosferu, na poljoprivredno, šumsko i građevinsko zemljište,
- c) zabranjuje se skladištenje opasnih i štetnih materija koje mogu negativno uticati na kvalitet voda u vodozaštitnim zonama i zonama sanitarne zaštite izvorišta voda za piće, a definirane su propisom iz člana 55. Osnovnog zakona.
- d) zabranjuje se pristup ljudima, prevoznim sredstvima i stoci obalama i vodama vještačkih akumulacija izgrađenih za potrebe snabdijevanja vodom za piće stanovništva i privrede,
- e) vode vještačkih akumulacija iz tačke e) ovog člana ne mogu se koristiti za kupanje, vožnju plovilima na pogon naftnim derivatima, za uzgoj ribe i za postavljanje plutajućih i drugih objekata u vodi i na obalama vještačke akumulacije, izuzev za proizvodnju električne energije za vlastite potrebe akumulacije i sistema koji snabdjeva vodom ta akumulacija.

Član 36.

(Korištenje višenamjenske akumulacije)

Voda višenamjenskih akumulacija čija je osnovna namjena snabdijevanje stanovništva i privrede vodom može se koristiti i za proizvodnju električne energije, sport, rekreaciju, plovidbu bez pogona na naftne derivate i za uzgoj riba, ukoliko ne ugrožava njenu osnovnu namjenu.

Član 37.

(Opšta obaveza odvodnje i tretmana otpadnih voda)

(1) Pravno i fizičko lice dužno je vodu ispuštati u javni kanalizacioni sistem ili na drugi način, u skladu sa odlukom o odvodnji otpadnih voda, koja obavezno sadrži elemente propisane članom 54. st. (1) i (2) Osnovnog zakona.

(2) Odluku o odvodnji otpadnih voda donosi:

a) za područje općine - općinsko vijeće, ukoliko prijem i transport otpadnih voda čini cjelovit sistem na teritoriji jedne općine,

b) Skupština Kantona za područje dvije ili više općina.

Član 38. (Septičke jame)

(1) Vlasnici, odnosno korisnici stambenih, privrednih objekata, vikend kuća i drugih objekata, koji nisu priključeni na javnu kanalizacionu mrežu, dužni su da svoje otpadne vode ispuštaju u vodonepropusne septičke jame i da iste redovno prazne, a minimalno jednom godišnje, odnosno po potrebi. Pražnjenje se vrši angažovanjem specijalizovanog pravnog lica koje je dužno od komunalnog javnog preduzeća pribaviti saglasnost za ispuštanje otpadnih voda u kanalizacioni sistem.

(2) Saglasnost iz stava (1) ovog člana obavezno sadrži uslove i mjesto ispuštanja otpadnih voda iz specijalizovanog vozila u objekte javnog kanalizacionog sistema, kao i visinu naknade koja se plaća javnom komunalnom preduzeću za ispuštanje otpadnih voda iz septičkih jama u javni kanalizacioni sistem.

(3) Pravno lice koje vrši pražnjenje septičkih i ostalih jama dužno je da ustroji i vodi evidenciju o izvršenom pražnjenju septičkih i drugih jama.

Član 39. (Obaveza prečišćavanja voda)

Pravna i fizička lica, korisnici kanalizacionog sistema na području Kantona, a koji u procesu proizvodnje ili rada proizvode opasne i štetne materije za vode dužni su da iste prečiste do nivoa koji je u skladu sa propisom iz člana 55. stav (1) Osnovnog Zakona.

Član 40. (Granične vrijednosti za ispuštanje otpadnih voda)

Vlada može, u odnosu na uslove utvrđene propisom iz člana 55. stav (1) Osnovnog zakona, donijeti odluku o dodatnim uslovima, o graničnim vrijednostima zagađujućih materija u otpadnim vodama i drugim zahtjevima kada je u pitanju ispuštanje otpadnih voda u površinske ili podzemne vode kao i odluku o opasnim prioritetnim materijama za vode koje su u nadležnosti Kantona,

2. Zaštićena područja

Član 41. (Područja zaštite izvorišta vode za piće)

(1) Područje na kojem se nalazi izvorište vode koje se po količini i kvalitetu može koristiti ili se koristi za javno snabdijevanje vodom za piće mora biti zaštićeno od zagađenja i drugih nepovoljnih uticaja na zdravstvenu ispravnost vode ili izdašnost izvorišta.

(2) Na područjima iz stava (1) ovog člana provodi se zaštita izvorišta utvrđivanjem zona sanitarne zaštite čija se veličina, granice, sanitarni režim, mjere zaštite i drugi uslovi određuju u skladu sa propisom iz člana 66. stava (3) Osnovnog zakona.

(3) Na osnovu propisa iz stava (2) ovog člana i istražnih radova donosi se odluka o provođenju zaštite izvorišta. Odluka sadrži naročito: granice zona sanitarne zaštite, sanitarne i druge uvjete u pojedinim zonama i druge mjere zaštite, zabrane i ograničenja, izvore i način finansiranja za provođenje zaštitnih mjera, nazive organa i pravna lica koja će provoditi odluku, te kazne za provedbu odredaba te odluke.

Član 42. **(Odluka o zaštiti izvorišta)**

(1) Zone sanitarne zaštite i zaštitne mjere utvrđuje općinski organ uprave nadležan za vode na čijem području se nalazi izvorište.

(2) Odluku o zaštiti izvorišta čije se zone sanitarne zaštite prostiru na području općine donosi općinsko vijeće.

(3) Odluku o zaštiti izvorišta čije se zone sanitarne zaštite prostiru na području Grada donosi Gradsko vijeće.

(4) Odluku o zaštiti izvorišta čije se zone sanitarne zaštite prostiru na području Grada i vangradskih općina donosi Skupština.

(5) Odluku o zaštiti izvorišta čije se zone sanitarne zaštite prostiru na području dvije ili više općina koje nisu na području Grada donosi Skupština.

(6) Odluke o zaštiti izvorišta iz st. (2), (3), (4) i (5) donose se u skladu sa propisom iz člana 66. stav (3) Osnovnog zakona.

Član 43. **(Privremena zaštita izvorišta)**

Nadležni organ iz člana 42. ovog Zakona, u skladu sa prijedlogom nadležne agencije provodi mjere privremene zaštite izvorišta vode od značaja za buduće snabdijevanje vodom za piće, korištenje izvora mineralne, termalne ili druge podzemne vode.

VII. OGRANIČENJE PRAVA VLASNIKA, ODNOSNO KORISNIKA ZEMLJIŠTA

Član 44.

(Služnosti)

Za ustanovljenje prava služnosti radi provođenja ovog Zakona primjenjuju se odredbe Zakona o vlasničko-pravnim odnosima ("Službene novine Federacije BiH", broj 6/98 i 29/03), te odredbe o služnostima iz propisa o građenju i eksproprijaciji.

**Član 45.
(Zabrana mijenjanja pravca vode)**

Vlasnik odnosno korisnik zemljišta ne može na štetu susjednih zemljišta mijenjati pravac ili količinu vode koja prirodno otiče preko njegovog zemljišta ili kroz njegovo zemljište (podzemne vode).

VIII. UREĐENJE VODOTOKA I DRUGIH VODA I ZAŠTITA OD ŠTETNOG DJELOVANJA OD VODA**Član 46.
(Uređenje vodotoka i drugih voda)**

Prema ovom Zakonu uređenje vodotoka i drugih voda je održavanje vodotoka i vodnog dobra, kao i drugi radovi kojima se omogućava kontrolirani i neškodljiv protok vode.

**Član 47.
(Održavanje vodotoka, vodnog dobra i vodnih objekata)**

Održavanje vodotoka, vodnog dobra, vodnih objekata i sistema obuhvata naročito:

- a) rad na održavanju prirodnih i vještačkih vodotoka kao što je oblaganje korita obala, čišćenje, uklanjanje nanosa i djelimično produbljavanje dna korita, ublažavanje zavoja bez značajnije promjene trase korita i sl.,
- b) izvođenje zemljanih radova i sličnih radova na uređenju i održavanju obala, zemljanih radova u inundacionom pojasu, krčenje i košenje rastinja, obnavljanje i održavanje propusta i prijelaza,
- c) održavanje regulacionih zaštitnih vodnih objekata kao što je popravak, pojačanje i obnavljanje nasipa, krčenje, košenje i rad na vegetativnoj zaštiti objekata, zamjena oštećenih dijelova građevine i sl.,

d) održavanje vodnih objekata za melioracionu odvodnju kao što je čišćenje, tehničko održavanje objekata i pojasa uz objekte, zemljane radove na manjim dopunama kanalske mreže, ublažavanje zavoja, nagiba, drenažni radovi, izrada tipskih propusta i sličnih objekata koji su sastavni dio kanalske mreže, njihovo obnavljanje, zamjena i sl.

Član 48.
(Planiranje i izvođenje uređenja)

Zahvati uređenja voda planiraju se i izvode na način koji ne utiče na pogoršanje karakteristika režima voda i bitno ne remete prirodnu ravnotežu vodnih i priobalnih ekosistema.

Član 49.
(Obaveze nadležnih nivoa vlasti)

- (1) Kanton, Grad i općina zajednički osiguravaju uređenje vodotoka i drugih voda u skladu sa čl. 5. i 7. Osnovnog zakona, svako u okviru svoje nadležnosti.
- (2) Kanton, Grad i općina, zajednički osiguravaju izgradnju, rekonstrukciju i održavanje vodnih objekata iz člana 12. ovog Zakona, svako u okviru svoje nadležnosti, na način propisan ovim Zakonom.

Član 50.
(Zaštita od štetnog djelovanja voda)

- (1) Pod zaštitom od štetnog djelovanja voda podrazumijeva se provođenje aktivnosti i mjera u cilju smanjenja ili sprečavanja ugroženosti ljudi i materijalnih dobara od štetnog djelovanja voda i otklanjanja posljedica njihovog djelovanja.
- (2) Zaštita od štetnog djelovanja voda odnosi se na odbranu od poplava i leda na vodotocima i zaštitu od erozija i bujica.
- (3) Osim zaštite iz stava (2) ovog člana zaštita od štetnog djelovanja voda obuhvata i mjere zaštite otklanjanja posljedica prouzrokovanih vanrednim zagađenjem voda.

Član 51.
(Ugrožena područja)

- (1) Radi smanjenja stepena ugroženosti ljudi i materijalnih dobara i provođenja mjera i aktivnosti zaštite od štetnog djelovanja voda određuje se područje koje je ugroženo:

- a) poplavama (u daljem tekstu: poplavno područje),
- b) erozijom površinskih voda (u daljem tekstu: erozivno područje).

(2) Područja iz stava (1) ovog člana (u daljem tekstu: ugrožena područja) određuju se u skladu sa članom 86. Osnovnog zakona.

Član 52. **(Poplavno područje)**

Poplavno područje je područje uz vodotok koje može biti poplavljeno tokom poplavnog događaja usljed izlivanja vode iz korita, bez obzira na to da li je područje osigurano zaštitnim objektima.

Član 53. **(Erozivno područje)**

Erozivno područje je područje čije je zemljište stalno ili povremeno pod uticajem površinske, dubinske ili bočne erozije vode, a koje je:

- a) izvor plavina (erozivno žarište),
- b) pod uticajem bujica,
- c) sastavljeno od zemljišta podložnog ispiranju.

Član 54. **(Obaveze nadležnih nivoa vlasti)**

(1) U cilju zaštite od štetnog djelovanja voda, Kanton, Grad i općina na ugroženom području, svako u okviru svoje nadležnosti prema odredbama ovog Zakona i Osnovnog zakona, planiraju mjere zaštite, gradnju i upravljanje zaštitnim vodnim objektima, a naročito gradnju nasipa, brana, pregrada, objekata za stabilizaciju dna obala, objekata za odvođenje unutrašnjih voda i sl.

(2) Mjere i aktivnosti iz stava (1) ovog člana provode se i izvan ugroženog područja sve do nivoa riječnog bazena, ako se njima povećava stepen zaštite.

(3) Ciljevi zaštite od štetnog djelovanja voda moraju biti sadržani i u drugim sektorskim planovima u skladu sa članom 42. Osnovnog zakona.

(4) Mjere i aktivnosti zaštite od poplava dijele se na sljedeće faze: fazu planiranja i pripremnu fazu, fazu aktivne odbrane od poplava i fazu sanacije posljedica

štetnog djelovanja voda.

Član 55.
(Obim zaštite od štetnog djelovanja voda)

(1) Obim zaštite od štetnog djelovanja voda i potrebne mjere određuju se sljedećim planovima:

- a) posebnim planovima zaštite od poplava i leda,
- b) planovima zaštite od erozija i bujica
- c) planovima zaštite od vanrednog zagađenja voda.

(2) Kod određivanja obima zaštite iz stava (1) ovog člana u obzir se naročito uzimaju:

- a) značaj ugroženog područja, veličina naselja, vrijednost infrastrukture ili zemljišta,
- b) prirodne i socijalne prilike stanovništva na ugroženom području,
- c) potrebne mjere za zaštitu, uključujući i cijenu njihove izvodljivosti, visinu troškova, te posljedice za prirodnu ravnotežu,
- d) osjetljivost vodnog talasa na mogućnost iznenadnog zagađenja.

Član 56.
(Obaveza ostavljanja podataka o monitoringu)

Vlasnik, odnosno korisnik objekta od značaja za zaštitu od štetnog djelovanja voda dužan je vršiti monitoring i podatke o tome dostavljati u informacijski sistem voda iz člana 98. Osnovnog zakona, na način propisan vodnim aktom.

Član 57.
(Faza aktivne odbrane od poplava)

(1) Za vrijeme neposredne opasnosti od pojave velikih (poplavnih) voda, Kanton, Grad i općina osiguravaju, svako u okviru svoje nadležnosti prema odredbama ovog Zakona i Osnovnog zakona, provođenje mjera aktivne odbrane od poplava.

(2) Mjere iz stava (1) ovog člana su naročito:

- a) mjere na ugroženim područjima i zaštitnim vodnim objektima kojima se sprečava nastanak težih posljedica štetnog djelovanja voda,
- b) povećan nadzor nad zaštitnim objektima i na ugroženim područjima,
- c) odstranjivanje naplavina u cilju povećanja kapaciteta protočnosti riječnog korita,
- d) provođenje privremenih mjera kao što je postavljanje odbrambenog nasipa, nasipanje, saniranje proboja i dr.

(3) Kod provođenja aktivne faze odbrane od poplava potrebno je preduzeti najveće moguće mjere za očuvanje karakteristika ekosistema i prirodnih vrijednosti.

(4) Ministar, na osnovu federalnog propisa iz člana 90. stav (3) Osnovnog zakona, donosi plan o mjerama aktivne odbrane od poplava i načinu njihovog provođenja za područja površinske vode II kategorije na teritoriji Kantona.

Član 58. (Način provođenja mjera)

Kod provođenja mjera aktivne odbrane od poplava ili kod vanrednog zagađenja nadležni organi vlasti, pravna i fizička lica moraju postupati tako da u što manjoj mogućoj mjeri ugroze kvalitet vode i da ne oštete vodno dobro i priobalno zemljište, vodne objekte i drugu infrastrukturu, te u najvećoj mogućoj mjeri očuvaju hidromorfološke karakteristike vodotoka.

Član 59. (Sanacije posljedica štetnog djelovanja voda)

(1) Sanacija posljedica štetnog djelovanja voda izvodi se na osnovu programa sanacije.

(2) Sredstva za sanaciju posljedica štetnog djelovanja voda nastale na vodnom dobru, priobalnom ili drugom zemljištu ili na drugoj vodnoj infrastrukturi ili drugom vodnom objektu i uređaju, koji je u vlasništvu Kantona, Grada i općina osigurava Kanton iz prikupljenih vodnih naknada;

(3) Sredstva za sanaciju posljedica štetnog djelovanja voda nastalih na vodnom objektu ili uređaju namijenjenom za posebno korištenje voda i vodnog dobra koji nije u vlasništvu Kantona, osigurava vlasnik vodnog objekta ili uređaja.

(4) Ako lice iz stava (3) ovog člana ne osigura sanaciju, a to je značajno za funkcionisanje sistema zaštite od štetnog djelovanja voda, Ministarstvo sanaciju osigurava na njegov teret.

(5) Bez obzira na odredbe st. (2)-(4) ovog člana troškove sanacije posljedica vanrednog zagađenja voda snosi pravno ili fizičko lice zbog čije je radnje ili propuštanja radnje nastupilo zagađenje.

(6) Program sanacije iz stava (1) ovog člana predlaže Ministarstvo, a donosi Vlada u roku od šest mjeseci od dana procjene štete i pripreme prijedloga programa sanacije. Procjenu štete i pripremu prijedloga programa sanacije vrši posebna komisija za procjenu štete, u skladu sa ovim Zakonom i propisima o zaštiti od prirodnih i drugih nesreća.

Član 60. (Opšte zabrane)

Na vodnom dobru i priobalnom zemljištu zabranjene su djelatnosti i zahvati u prostoru koji mogu:

- a) ugroziti stabilnost priobalnog zemljišta,
- b) umanjiti stepen zaštite od štetnog djelovanja voda,
- c) spriječiti normalan protok vode, naplavina i mulja,
- d) onemogućiti opstanak i razmnožavanje vodnih i za vodu vezanih organizama.

Član 61. (Zabrane na poplavnom području)

(1) Na poplavnom području su, osim zabrana iz člana 12. Osnovnog zakona, izričito zabranjene sve aktivnosti koje mogu za vrijeme poplava imati štetan uticaj na vode, vodno dobro, priobalno zemljište i zaštitne objekte, a naročito:

- a) na odbrambenom nasipu, odnosno obodnom kanalu i inundacionom području kopati zemlju, saditi drveće i grmlje, pobijati kolje i druge predmete, kao i postavljati rampe, ako ovim zakonom nije drugačije određeno,
- b) na nasipu graditi objekte koji nemaju karakter zaštitnog objekta,
- c) vršiti vađenje materijala (šljunak, pijesak, kamen i glina) u inundacionom području, odnosno u branjenom području na udaljenosti od 100 metara od vanjske (vodne) nožice nasipa,
- d) graditi bunare na udaljenosti manjoj od 50 metara od vanjske nožice nasipa, kopati (bušiti) jame ili paralelne kanale na udaljenosti manjoj od 20 metara od unutrašnje nožice, odnosno 10 metara od vanjske nožice nasipa,

- e) podizati ograde i živice na udaljenosti manjoj od 20 metara sa unutrašnje strane i 10 metara sa vanjske strane od nožice nasipa, kao i graditi objekte (stambeni, privredni i drugi) sa unutrašnje strane nasipa na udaljenosti manjoj od 20 metara od nožice nasipa i u inundacionom području,
- f) obrađivati zemlju na udaljenosti manjoj od 10 metara od nožice nasipa,
- g) podizati pregrade u inundacionom području,
- h) puštati po nasipu, obodnom i odvodnom kanalu stoku radi ispaše ili prevoditi stoku izvan mjesta određenog za prelaz,
- i) oštećivati ili uništavati uređaje na nasipu (rampa, oznaka, vodomjer i dr.) ili uređaje za registraciju promjena na vodama,
- j) na nasipu i njegovom zaštitnom pojasu i u inundacionom području istovarati ili ostavljati bilo kakav materijal, izuzev materijala za odbranu od poplava (deponija, kamen i zemlja),
- k) oštećivati ili neovlašćeno rukovati akumulacijama i njihovom opremom, crpnim stanicama, ustavama, kanalima, tunelima, kulama zatvaračnicama i njenim pripadajućim objektima, dalekovodima, trafostanicama i sistemom veza,
- l) neovlašćeno koristiti pristupne puteve od zaštitnih objekata,
- m) mijenjati pravac vodotoka i kanala, bez vodne saglasnosti i vodne dozvole, odnosno protivno uslovima određenim u vodnoj dozvoli,
- n) unositi u vodotoke i jezera, akumulacije i retenzije, kao i deponovati na obale vodotoka, jezera, akumulacija i retenzija kamen, zemlju jalovinu i druge krute i tečne materije i materijale,
- nj) saditi drveće na udaljenosti manjoj od 10 metara od linije dopiranja velikih voda vodotoka, odnosno 10 metara od rubne linije akumulacije ili retenzije, obodnog ili vještačkog kanala izuzev zaštitnih šuma,
- o) podizati zgrade i druge objekte koji ne služe odbrani od poplava koji sprečavaju prilaz vodotoku na udaljenosti manjoj od 10 metara od linije dopiranja velikih stogodišnjih voda za sve površinske vode, izuzev ako je vlasniku ili korisniku uslovljena izgradnja objekta prethodnim preduzimanjem zaštitnih mjera kojima se onemogućuju ili smanjuju štetne posljedice od voda,
- p) vršiti radnje koje mogu oštetiti korito i obale vodotoka, jezera, odnosno korito kanala, korito obale akumulacije ili retenzije ili tunela ili smetati slobodnom oticanju vode,
- r) izvoditi radove u blizini vodotoka, jezera, kanala, tunela, akumulacije i erozije, koji bi mogli ugroziti stabilnost zaštitnih vodnih objekata ili njihovu upotrebu (kopanje šljunka, pijeska, kamena i sl.).

(2) Zabranjeno je bez pismene saglasnosti nadležnog organa za vode:

- a) u inundacionom području saditi drveće i grmlje, sjeći drveće i krčiti rastinje,
- b) u inundacionom području sjeći zaštitne šume ili drugo drveće i vršiti druge radove koji mogu dovesti do erozivnih procesa,
- c) vršiti promet vozilima po odbrambenim nasipima.

Član 62. **(Zabrane na erozivnom području)**

(1) Na erozivnom području zabranjeno je:

- a) izvoditi građevinske i druge zahvate u prostoru i na način koji pospješuje eroziju,
- b) ogoljevanje površina,
- c) krčenje šumskih površina koje sprečavaju klizanje zemljišta i snježne naslage, izravnavaju protoke ili na drugi način štite nizvodna područja od štetnih uticaja erozije,
- d) zatrpavanje izvora,
- e) sakupljanje ili odvođenje sabirnih voda preko erozivnih ili kliznih zemljišta bez nadzora,
- f) ograničavanje protoka vodenih bujica, jačanje erozivne snage vode i slabljenje uravnoteženih odnosa,
- g) izvlačenje, odlaganje ili skladištenje drva i drugih materijala,
- h) zatrpavanje otkopanim ili otpadnim materijalom,
- i) sakupljanje naplavina sa dna i korita osim za osiguranje protočne moći korita bujica.

(2) Uslovi za zahvat u prostoru na ugroženom području detaljno se određuju vodnim aktima u skladu sa odredbama člana 109. stav (2) alineja 3) Osnovnog zakona.

IX. VODNI AKTI

Član 63.
(Vrste vodnih akata)

Radi osiguranja upravljanja vodama i osiguranja pravičnog pristupa vodi svim pravnim i fizičkim licima u smislu ovog Zakona izdaju se vodni akti, a obaveza pribavljanja vodnih akata, vrste, postupak za izdavanje, oduzimanje i troškovi izdavanja istih i ostalo definisano je Osnovnim zakonom.

Član 64.
(Vodni akti koje izdaje Ministarstvo)

Ministarstvo je u smislu člana 139. stav (2) Osnovnog zakona nadležno za izdavanje vodnih akata za:

- a) zahvatanje vode u količini do 10 litara u sekundi,
- b) ispuštanje otpadnih voda za naselja koja imaju do 2.000 stanovnika;
- c) vađenje materijala iz površinskih voda II kategorije,
- d) izgradnju hidroelektrane za proizvodnju električne energije kada je postrojenje locirano na površinskim vodama II kategorije, snage do 5 MW,
- e) formiranje akumulacije koja je locirana na površinskim vodama II kategorije na području Kantona,
- f) izgradnja objekata za zaštitu od poplava na površinskim vodama II kategorije, ako te aktivnosti ne utiču na površinske vode I kategorije.

XI. ORGANIZACIJA UPRAVLJANJA VODAMA

Član 65.
(Poslovi i zadaci Ministarstva)

- (1) Organizacija upravljanja vodama podrazumijeva potpuno plansko i domaćinsko upravljanje vodama, vodnim objektima i javnim vodnim dobrom, a sve u cilju potpunijeg i racionalnijeg korištenja voda Kantona, Grada i općina.
- (2) Poslovi i zadaci Ministarstva.
- (3) Ministarstvo izvršava poslove i zadatke utvrđene ovim Zakonom a naročito:

- a) izrađuje godišnje programe utroška sredstava, prikuplje- nih po osnovu vodnih naknada na području Kantona, u skladu sa iskazanim potrebama na nivou općina;
- b) organizuje, odnosno vrši sve poslove i zadatke radi izvršavanja programa iz tačke a) ovog člana;
- c) organizuje vršenje istražnih radova, izradu investiciono- tehničke i druge dokumentacije i vršenje revizije iste;
- d) izdaje vodne akte u skladu sa čl. 63. i 64. ovog Zakona;
- e) saraduje sa nadležnom agencijom za vode prilikom izrade planova;
- f) ustupa podatke od značaja za upravljanje vodama nadležnoj agenciji;
- g) vrši i druge poslove i zadatke u skladu sa ovim Zakonom i Osnovnim zakonom.

XII. FINASIRANJE UPRAVLJANJA VODAMA

Član 66. (Finansiranje)

Poslovi i zadaci Kantona određeni ovim Zakonom finansiraju se iz:

- a) dijela sredstava prikupljenih po osnovu vodnih naknada i zakupa javnog vodnog dobra na vodama I kategorije, koja po članu 177. stav (1) tačka 2. Osnovnog zakona pripadaju Kantonu;
- b) prihoda po osnovu zakupa javnog vodnog dobra na površinskim vodama II kategorije;
- c) budžeta, Kantona, Grada i općina;
- d) kreditnih sredstava,
- e) sredstava osiguranih posebnih zakonom,
- f) donacija i ostalih sredstava u skladu sa zakonom.

Član 67.
(Korištenje prihoda)

Prihodi iz člana 66. tačka a) ovog Zakona koriste se za sufinansiranje izgradnje i održavanje vodnih objekata iz člana 14. stav (1) i (2) Osnovnog zakona, kao i ostale aktivnosti vezane za poslove zaštite izvorišta, upravljanja vodama (izrada tehničke dokumentacije, uređenje i održavanje vodotoka, podloga za izdavanje koncesija i dr.) u skladu sa petogodišnjim planom upravljanja vodama, na osnovu kojeg će se donosti godišnji planovi i programi utroška sredstava.

Član 68.
(Institucija)

1) Na osnovu člana 167. stav (1), a u skladu sa članom 177. stav (3) Osnovnog zakona Skupština će na prijedlog Vlade donijeti petogodišnji plan upravljanja vodama,

2) Vlada će na prijedlog Ministarstva privrede i Ministarstva prostornog uređenja i zaštite okoliša usvojiti godišnji plan i program utroška sredstava iz člana 177. stav (1) tačka 2. Osnovnog zakona.

XIII. NADZOR NAD PROVOĐENJEM OVOG ZAKONA

1. Upravni nadzor

Član 69.
(Upravni nadzor)

Ministarstvo vrši upravni nadzor nad provođenjem ovog Zakona, propisa donesenih na osnovu ovog Zakona i propisa za čije su donošenje po ovom Zakonu nadležni Grad i općine.

Član 70.
(Nadzor nad ispravnošću vode)

Ministarstvo zdravstva vrši nadzor nad zdravstvenom ispravnošću vode za piće iz svih objekata vodosnabdijevanja na području Kantona.

Član 71.

(Žalba)

Protiv rješenja Ministarstva o izdatom vodnom aktu iz člana 64. ovog Zakona donesenom u prvostepenom postupku, žalba se izjavljuje federalnom ministarstvu poljoprivrede, vodoprivrede i šumarstva.

2. Inspekcijski nadzor

Član 72. (Zajedničke odredbe)

Inspekcijski nadzor nad provođenjem ovog Zakona i propisa donesenih na osnovu ovog Zakona provodi se u skladu sa odredbama ovog Zakona, Zakona o organizaciji organa uprave u Federaciji Bosne i Hercegovine ("Službene novine Federacije BiH", broj 35/05) koje se odnose na inspekcijski nadzor i Zakona o organizaciji organa uprave i upravnih organizacija Kantona Sarajevo ("Službene novine Kantona Sarajevo", br. 7/08 i 16/08 - Ispravka) koje se odnose na inspekcijski nadzor.

Član 73. (Kantonalna vodna inspekcija)

Inspekcijski nadzor nad provođenjem ovog Zakona i propisa donesenih na osnovu ovog Zakona koji su Osnovnim Zakonom stavljeni u nadležnost Kantona, provodi kantonalna vodna inspekcija.

Član 74. (Predmet inspekcijskog nadzora)

Inspekcijski nadzor obuhvata:

- a) poduzimanje inspekcijskih radnji na utvrđivanju stanja izvršavanja propisa kod pravnih i fizičkih osoba koje su u obavljanju svoje djelatnosti dužne postupati prema odredbama ovog Zakona i propisa donesenih na osnovu ovog Zakona,
- b) određivanje upravnih mjera radi sprečavanja i otklanjanja nezakonitosti u izvršavanju propisa iz tačke a) ovog člana,
- c) preduzimanje drugih mjera određenih ovim Zakonom, Zakonom o inspekcijama i drugim propisima.

Član 75.
(Ovlaštenja inspektora)

(1) U skladu sa odredbama ovog Zakona kantonalni vodni inspektor je dužan:

- a) spriječiti neovlašteno korištenje vode na području Kantona u smislu odredbi ovog Zakona,
- b) spriječiti ili ograničiti korištenje vode, ako se ona ne koristi u skladu sa vodnom dozvolom koju je izdalo Ministarstvo,
- c) zaustaviti izgradnju ili izvođenje zahvata u prostoru, ako se izgradnja ili zahvati izvode bez ili u suprotnosti sa vodnom dozvolom koju je izdalo Ministarstvo,
- d) odrediti privremeni prekid obustavljanja djelatnosti, ako se krše odredbe dozvole iz tačke b) ovog člana,
- e) zabraniti upotrebu objekata i uređaja ako se koriste bez ili u suprotnosti sa vodnom dozvolom koju je izdalo Ministarstvo,
- f) zabraniti ili ograničiti ispuštanje otpadnih voda u površinske vode ili indirektno ispuštanje otpadnih voda u podzemne vode u suprotnosti sa odredbama čl. 37. i 38. ovog Zakona i odrediti uspostavljanje prvobitnog stanja,
- g) zabraniti vađenje materijala iz površinskih voda, ako se vađenje tog materijala vrši bez vodnog akta ili u suprotnosti sa vodnim aktima koje je izdalo Ministarstvo,
- h) odrediti obavezu utvrđivanja štete i naknade štete nastale radnjama iz tačke g) ovog člana,
- i) odrediti i druge mjere u skladu sa ovim Zakonom ili na osnovu propisa i vodnih akata donesenih na osnovu ovog Zakona.

Član 76.
(Upravne radnje)

(1) Kantonalni vodni inspektor u obavljanju poslova inspeksijskog nadzora o utvrđenim činjenicama sačinjava zapisnik.

(2) Kantonalni vodni inspektor donosi pisano rješenje i odmah naređuje njegovo izvršenje ako:

- a) prijete opasnost od poplava, izlivanja voda ili pogoršanja stanja u toku poplave,
- b) prijete nastanak nestašice vode ili teškoće u snabdijevanju vodom,
- c) postoji opasnost od zagađenja vode ili je nastupilo zagađenje u obimu u kojem to predstavlja neposrednu opasnost po život i zdravlje ljudi ili životinjski ili biljni

svijet,

- d) postoji neposredna opasnost za zagađenje izvora vode namijenjenog snabdijevanju vodom za piće,
- e) postoji neposredna opasnost od zagađenja površinskih i podzemnih voda,
- f) nastupi suša ili bi iz drugih razloga moglo doći do nestašice vode ili poteškoća u snabdijevanju vodom za piće,
- g) postoji neposredna opasnost od pojave odrona zemlje, klizišta ili drugih vidova erozije,
- h) je to potrebno za osiguranje provođenja opće upotrebe voda iz člana 27. ovog Zakona ili ukoliko se vlasnik ili drugi korisnik vodnog dobra iz ili drugog priobalnog zemljišta suprotstavlja prelasku preko svoje zemlje ili obavljanju radova radi provođenja ovog Zakona,
- i) je potrebno za osiguranje izvođenja radova na istraživanju voda u skladu sa odredbama ovog Zakona,
- j) zahtijevaju to i druge hitne situacije određene zakonom.

(3) Izuzetno kantonalni vodni inspektor za slučajeve iz tačke a), c), d), g) i j) stav (2) ovog člana može donijeti usmeno rješenje i narediti njegovo izvršenje bez odlaganja, s tim što je dužan donijeti pisano rješenje najkasnije u roku od osam dana od dana donošenja usmenog rješenja. Sadržaj pisanog rješenja mora odgovarati sadržaju usmenog rješenja.

Član 77. **(Stručni poslovi po nalogu inspekcije)**

(1) Obavljanje stručnih poslova za potrebe inspeksijskog nadzora (radovi na sprečavanju širenja zagađenja u slučaju akcidenta i čišćenje zagađenja iz vode i vodnog dobra, ispitivanje, ekspertiza i sl.) koji zahtijevaju posebnu tehničku opremu i specijalizovane stručnjake ili primjenu naučnih metoda i postupaka može se povjeriti ovlaštenim i osposobljenim institucijama (ustanovi, preduzeću, laboratoriji, društvu) koje obavljaju takve poslove.

(2) Institucije iz stava (1) ovog člana mogu se angažovati na osnovu naloga kantonalnog vodnog inspektora putem Agencije.

Član 78. **(Inspeksijski postupci)**

(1) Kada utvrdi da je povrijeđen ovaj Zakon, propis ili akt donesen na osnovu ovog Zakona, kantonalni vodni inspektor zapisnikom konstatuje nepravilnost ili nedostatak i rješenjem određuje mjere za njihovo uklanjanje.

(2) Pored ovlaštenja i dužnosti određenih zakonom, u slučaju iz stava (1) ovog člana, kantonalni inspektor ovlašten je i dužan da:

- a) naredi obustavljanje izvođenja radova, ako se vrše protivno vodnom aktu ili se vrše bez vodnog akta, a propisana je obaveza njegovog pribavljanja,
- b) naredi u saradnji sa građevinsko-urbanističkom inspekcijom, uklanjanje sagrađenog objekta ili postrojenja bez vodnog akta, ako u roku od 60 dana nije pribavljen vodni akt,
- c) naredi privremenu obustavu rada, odnosno obavljanje djelatnosti pravnog lica ili njegovog dijela ako se utvrdi da otpadne vode sadrže opasne materije u količini većoj od dozvoljene ili da se zahvataju veće količine vode od dozvoljenih,
- d) zabrani preduzimanje radnji koje nisu dozvoljene ovim Zakonom.

Član 79. **(Žalba na rješenja inspektora)**

- (1) Protiv rješenja kantonalnog vodnog inspektora koje je doneseno na osnovu ovog Zakona žalba se izjavljuje Ministarstvu putem Kantonalne vodne inspekcije.
- (2) Žalba protiv rješenja Kantonalnog vodnog inspektora ne odlaže izvršenje rješenja za slučajeve iz člana 76. stav (2) i (3) ovog Zakona.

XIV. KAZNE NE ODREDBE

Član 80. **(Kazne za učinjene prekršaje za pravno lice)**

(1) Novčanom kaznom u iznosu od 5.000,00 KM do 50.000,00 KM bit će kažnjeno za prekršaj pravno lice ako:

- ako postupa suprotno odredbama člana 4. stav (2) ovog Zakona;
- ne održava vodni objekat protivno članu 19. st. (1), (2) i (3) ovog Zakona;
- ne pribavi vodnu dozvolu za korištenje vode koje prelazi obim opće upotrebe vode protivno članu 28. stav (1) ovog Zakona i odredbama člana 22. stav (2) ovog Zakona;
- protivno odredbama člana 32. koristi određeno područje;

- postupi suprotno odredbama člana 35. ovog Zakona;
- koristi vodu i ispušta vodu u površinske vode i vodno dobro ili vrši druge aktivnosti i zahvate bez pribavljenog vodnog akta za koje je osnovnim zakonom propisana obaveza pribavljanja vodnog akta (član 109. Osnovnog zakona);
- koristi vodu, ispušta otpadnu vodu u površinske vode i vodno dobro ili vrši druge radnje suprotno odredbama iz vodnog akta (vrši radnje suprotno odredbama člana 35. st. (2), (3) i (4) ovog Zakona),
- po isteku roka važenja vodne saglasnosti za vađenje materijala iz vodotoka ne dovede korito i obale vodotoka u stanje predviđeno vodnim aktom (član 114. stav (5) Osnovnog zakona);
- ne provodi odluku o zaštiti izvorišta iz člana 42. ovog Zakona;
- ne postupi po rješenju vodnog inspektora iz člana 78. stav ovog Zakona;
- izvodi radove na poplavnom području suprotno odredbama člana 61. ovog Zakona;
- izvodi radove na erozivnom području suprotno odredbama člana 62. ovog Zakona;

(2) Za prekršaj iz stava (1) ovog člana bit će kažnjeno odgovorno lice u pravnom licu novčanom kaznom u iznosu od 500,00 KM do 5.000,00 KM.

Član 81.

(Kazne za učinjene prekršaje za fizička lica)

Novčanom kaznom od 100,00 KM do 2.000,00 KM bit će kažnjeno fizičko lice za prekršaj ako:

- a) postupa suprotno odredbama člana 4. stav (2) ovog Zakona;
- b) vodni objekat iz člana 19. st. (1), (2) i (3) Zakona ne održava u funkcionalnom stanju i ne koristi u skladu sa njegovom prirodom i namjenom;
- c) po prestanku korištenja vodnog objekta iz člana 10. stav (3) i člana 12. ovog Zakona ne postupi u skladu sa odredbama člana 19. stav (2) ovog Zakona;
- d) ne čuva vodni objekat iz člana 10. stav (3) ovog Zakona i uređaje na njemu u skladu sa odredbama člana 19. stav (5) ovog Zakona;
- e) vrši radnje suprotno odredbama člana 35. ovog Zakona;

- f) ispušta otpadnu vodu suprotno odredbama člana 37. stav (1) ovog Zakona;
- g) ne poštuje zabrane iz odluke o zaštiti izvorišta iz člana 42. ovog Zakona;
- h) obavlja radove i radnje zabranjene čl. 66. i 67. ovog Zakona;
- i) koristi vodu, ispušta otpadne vode u površinske vode i vodno dobro ili vrši druge aktivnosti i zahvate bez pribavljenog vodnog akta za koje je ovim Zakonom propisana obaveza pribavljanja vodnog akta (član 109. Osnovnog zakona);
- j) koristi vodu, ispušta otpadne vode u površinske vode i vodno dobro ili vrši druge aktivnosti i zahvate suprotno odredbama iz vodnog akta;
- k) po isteku roka važenja vodne saglasnosti za vađenje materijala ne dovede korito u stanje predviđeno vodnim aktom (član 114. stav (5) Osnovnog zakona);
- l) ne postupi po rješenju vodnog inspektora iz člana 78. ovog Zakona.

XV. PRELAZNE I ZAVRŠNE ODREDBE

Član 82.

(Donošenje podzakonskih propisa)

Podzakonski propisi u skladu sa odredbama ovog Zakona donijet će se najkasnije u roku od dvije godine dana od dana stupanja na snagu ovog Zakona.

Član 83.

(Primjena ranijih odluka o zaštiti izvorišta)

Do donošenja odluka o zaštiti izvorišta iz člana 42. ovog Zakona primjenjivat će se odluke o zaštiti izvorišta voda za piće koje su donijeli Skupština Kantona, organi Grada i općina prije stupanja na snagu ovog Zakona.

Član 84.

(Prestanak primjene Zakona)

Danom stupanja na snagu ovog Zakona prestaje važiti Zakon o vodama Kantona Sarajevo ("Službene novine Kantona Sarajevo", broj 16/00).

Član 85.

(Stupanje na snagu)

Ovaj Zakon stupa na snagu osmog dana od dana objavljivanja u "Službenim novinama Kantona Sarajevo".

Broj 01-02-19772/10
21. jula 2010. godine
Sarajevo

Predsjedavajući
Skupštine Kantona Sarajevo
Dr. **Denis Zvizdić**, s. r.

Hvala što ste naš pretplatnik. Koristite pogodnosti koje dobijate pretplatom.

O nama

Javno preduzeće Novinsko-izdavačka organizacija SLUŽBENI LIST BOSNE I HERCEGOVINE. Sva prava pridržana. 2014

Adresa

Džemala Bijedića 39/III
71000 Sarajevo
Bosna i Hercegovina
Email: sllist@sllist.ba
(<mailto:sllist@sllist.ba>)

Kontakti

Centrala

Tel: 033/722-030

Email (<mailto:info@sllist.ba>)

Uredništvo

Tel: 033/722-038

Prodaja

Tel: 033/722-079

Oglasni odjel Email (<mailto:info@sllist.ba>)

odjel

Tel: 033/722-049 i 033/722-050, Fax:

Email (mailto:urednistvo@slist.ba)

Pravna služba

Tel: 033/722-051

Email (mailto:info@slist.ba)

Računovodstvo

Tel: 033/722-045, Fax: 033/722-046

Email

(mailto:racunovodstvo@slist.ba)

Pretplata

Tel: 033/722-054

Email (mailto:pretplata@slist.ba)

Ekspedit

Tel: 033/722-041

Email (mailto:info@slist.ba)

033/722-074

Email (mailto:oglasia@slist.ba)

Tehnički sekretar

Tel: 033/722-061, Fax: 033/722-064

Ured direktora

Tel: 033/722-061

Komercijala

Tel: 033/722-042